

凡例

一譜題羅湘別乎他邑而言之也凡塔寺前楊江課功橋穆屯花橋五祠均隸羅湘而不及他邑五祠原譜支派雖殊有此譜而後攝於一也

一譜宗歐蘇兩氏自宋迄今諸家相同五祠原譜有用歐式亦有用蘇式者茲悉遵歐式以昭劃一

一譜首序例次家規次服制圖次祠堂圖次祭宗器次傳贊次墳墓圖而終之以世系此諸家通例繁簡從宜要無甚懸異也

一世系首應鼎公次善鄉公次道選公次南山公次元鳳公以遷湘始祖先後爲先後明非同產無伯仲叔季之可言也

一祖皆書名臨文不諱也子孫有與先祖同名者一律更改五祠族繁不及徧查五代以上親盡服闋從廟中不諱之文可也

一年月均用舊厯以免歧異凡書年並紀干支恐有訛誤也民國以前或清或明或元必書朝代以明先後庶一覽而瞭如指掌也

一近代譜法有書世書派書沒書卒書妣書娶書配之不
同茲一律書世而不書派書沒而不書卒書配而不書
妣書娶以示統同而不致有繁襍之難辨也

一傳以紀實如有忠孝廉節以及品行端方力行慈善公
益可爲族中矜式者始表而出之不使湮歿足以風當
世後人也生不立傳蓋有待也

一正妻曰元配繼妻曰繼配妾曰副配諸家譜例也所生
子女仍註於所生母下者明所生也

一出繼之子於本生父母之下書出繼某爲嗣於承祧父

母之下書係某子入繼爲嗣重所生也於所後則祇書其之子者重爲人後也

一婦人夫死再醮者不書改適但於某氏上配字易用陰文以寓隱惡之意恐傷孝子之心也有子女者書生而不書沒葬然亦有書沒葬者哀人子之心傷其無歸也無子女者生不書義興廟絕外之也生而離異不書

一死而無嗣者不書無傳但於名下生沒後書一墨圈深沒其文以志痛也生未詳者書生闕沒未詳者書沒闕葬未詳者書生沒葬闕俱未詳者書生沒葬闕者辭窮

也子女早卒有生沒葬者書生沒葬無生沒葬者書殤存不忍之心也

一女已嫁書適某地某許嫁書字某重血脈之流傳示有家廣姻睦也未許嫁書待字

一撫養異姓螟蛉嬰堂之子及不詳所出者概不錄入防混宗也出撫異姓或流寓他鄉者必須詳載庶歸宗之日知有攸歸也

一五祠派系舊各不同均以遷湘始祖爲世紀仍舊相沿茲以各祠最後產生之派另立新派合族從同繼續銜

接以資統一此由分而合計無善於此也

一譜議三十年一續修並於茲屆修譜之後訂立孳生譜冊以後各祠有生沒者隨時登記爲異日續修之張本

一譜額共修三十冊以尊祖敬宗收族六子如標記

尊字號譜一冊付總祠收 祖字號譜十一冊付塔寺

前收 敬字號譜九冊付 楊江收 宗字號譜七冊

付課功橋收 收字號譜二冊付穆屯收 族字號譜

七冊付花橋收至領譜名目另列